



CONVENIO DE COLABORACIÓN ENTRE A AXENCIA GALEGA DE INFRAESTRUTURAS E O CONCELLO DE SANTA COMBA PARA HABILITAR UNHA SENDA PEONIL NA ESTRADA AC- 406 DENDE O POLÍGONO EMPRESARIAL DE SANTA COMBA

Santiago de Compostela, na data da sinatura electrónica

REUNIDOS

Dunha parte, Ethel M^a Vázquez Mourelle, presidenta da Axencia Galega de Infraestruturas, facultada para a formalización deste convenio polo Decreto 173/2011, do 4 de agosto, polo que se aproba o estatuto da Axencia Galega de Infraestruturas.

Doutra parte, María Josefa Pose Rodríguez, na súa condición de alcaldesa do Concello de Santa Comba, actuando en virtude das facultades representativas que lle atribúe o artigo 21.1 b) da Lei 7/1985, do 2 de abril, reguladora das bases do réxime local.

Ambas as dúas partes recoñécense mutuamente na calidade en que interveñen con capacidade legal suficiente e necesaria para o outorgamento do presente convenio de colaboración e a tal efecto

EXPOÑEN

Primeiro. A Axencia Galega de Infraestruturas ten entre os seus obxectivos, a mellora da rede viaria de Galicia, a ordenación do territorio e a súa cohesión, de xeito que se proporcione ás persoas usuarias unha rede eficaz, cómoda e segura, fomentando as relacións municipais e intermunicipais na procura e no fomento dun desenvolvemento harmónico. Entre os instrumentos de planificación que guían a actividade da Axencia está o Plan de Seguridade Viaria de Galicia 2022-2025, aprobado polo Consello da Xunta de Galicia de 28 de abril de 2022. O seu programa de actuación estrutúrase en retos e en accións, sendo o reto número 1 a "visión cero en usuarios vulnerables: mellora da seguridade dos peóns", e a acción 1.1, a construción de beirarrúas e sendas peonís.

Enmarcado en dito plan está a construción dunha senda peonil na marxe dereita da estrada autonómica AC-406, entre os puntos quilométricos 27+750 (acceso viario ao parque empresarial) e o 28+410, inicio do treito con beirarrúas da avenida de Santiago, no núcleo urbano de Santa Comba.





Segundo. Esta actuación permitirá poder acceder ao polígono industrial de Santa Comba dende o centro urbano a pé por un itinerario seguro ao enlazar coas beirarrúas da avenida de Santiago.

O concello está interesado en asumir a titularidade da senda unha vez finalizadas as obras coma unha nova infraestrutura local respectuosa co medio ambiente e a súa sostibilidade.

Os convenios entre administracións públicas constitúen o elemento adecuado para desenvolver a súa cooperación en cuestións de interese común, tal e como establecen o artigo 57 da Lei 7/1985, do 2 de abril, reguladora das bases de réxime local e o artigo 198 da Lei 5/1997, do 22 de xullo, de administración local de Galicia.

Considerando a confluencia dos intereses das partes comparecentes, faise preciso artellar as bases para a óptima coordinación e así regular a colaboración nas súas actuacións. Para o fin mencionado, formalízase o presente convenio con suxeición ás seguintes

CLÁUSULAS

PRIMEIRA. OBXECTO

O obxecto do presente convenio é establecer as bases da colaboración técnica e económica entre a Xunta de Galicia e o Concello de Santa Comba para habilitar como senda peonil un treito da cuneta da estrada autonómica AC-406, entre os puntos quilométricos 27+750 (acceso viario ao parque empresarial) e o 28+410, e o acceso ás fincas da marxe dereita.

As actuacións a realizar son as seguintes:

- Limpeza e perfilado da cuneta actual.
- Encofrado e revestimento da cuneta dende a última nave industrial ata o inicio das beirarrúas na avenida de Santiago no núcleo urbano do concello.
- Execución de accesos á fincas situadas na marxe dereita da estrada autonómica AC-406 Portomouro (AC-455) - Santa Comba (AC-400), nos Pqs 28+150 e 28+050

O orzamento de execución destas actuacións estímase en **corenta e dous mil douscentos corenta euros con trece céntimos (42.240,13)**, IVE incluído.





SEGUNDA.- COMPROMISOS DO CONCELLO DE SANTA COMBA

O Concello obrígase a:

- 1.- Poñer a disposición da Axencia Galega de Infraestruturas, de ser o caso, os terreos necesarios, libres de cargas e gravames e co réxime urbanístico axeitado para a execución das obras a que se refiren as actuacións descritas na cláusula primeira. A posta a disposición quedará formalizada na correspondente acta.
- 2.- Asumir a realización das xestións pertinentes ante os organismos que correspondan, para a obtención dos permisos, licencias e autorizacións regulamentarias, correndo cos custos que se xeren.
3. Aceptar, unha vez realizadas as obras o cambio de titularidade de todo o dominio público do treito da senda peonil resultante na estrada AC-406, no tramo comprendido entre os puntos quilométricos Pqs 27+750 (UTM etrs89 huso 29: x=517.006 / y=4.763.544) e 28+410 (UTM etrs89 huso 29: x=516.543 / y=4.763.993), sen afectar as beiravías nin a calzada. Para isto, tramitarase previamente expediente de cambio de titularidade consonte co establecido no artigo 9 da Lei 8/2013, do 28 de xuño, de estradas de Galicia e no Decreto 66/2016, do 26 de maio, polo que se aproba o Regulamento xeral de estradas de Galicia. A sinatura deste convenio xa supón o acordo entre ámbalas dúas administracións para iniciar a transferencia da titularidade de conformidade coa normativa aplicable.

TERCEIRA. – COMPROMISOS DA AXENCIA GALEGA DE INFRAESTRUTURAS

A Xunta de Galicia, a través da AXI asume os seguintes compromisos:

1. Elaborar e aprobar o documento técnico para realizar as obras previstas no presente convenio.
2. Adxudicar, dirixir e financiar as obras, segundo o proxecto. Para isto destinará ata un máximo de **corenta e dous mil douscentos corenta euros con trece céntimos** (42.240,13€) con cargo á partida orzamentaria 09.A1 512B 600.1, código de proxecto 2018-00012 dos orzamentos da Axencia Galega de Infraestruturas do ano 2023.

CUARTA.- SEGUIMIENTO E CONTROL

Para o seguimento, control e avaliación das dúbidas que poidan xurdir na aplicación do convenio constituírse unha comisión de seguimento, coa





participación dun representante da Axencia Galega de Infraestruturas e dun representante do Concello de Santa Comba.

A comisión poderase reunir as veces que se estime oportunas para o cumprimento do convenio. En todo caso, a solución das incidencias que poidan xurdir estará condicionada polas limitacións orzamentarias incluídas na cláusula terceira.

As cuestións litixiosas xurdidas da interpretación, desenvolvemento e aplicación do convenio serán resoltas pola Axencia Galega de Infraestruturas, poñendo os seus acordos fin á vía administrativa. Contra estes acordos poderase interpoñer recurso contencioso-administrativo ante o Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

QUINTA.- NATUREZA DO CONVENIO

Este convenio ten natureza administrativa e regularase polo establecido no presente convenio e, subsidiariamente, polos principios da Lei 9/2017, do 8 de novembro, de contratos do sector público, e da Lei 40/2015 do 1 de outubro do réxime xurídico do sector público.

O desenvolvemento dos compromisos, obrigas e demais actuacións contidas no presente convenio rexeranse polo establecido nas cláusulas do mesmo.

SEXTA.-MODIFICACIÓNS DO CONVENIO

As modificacións formalizaranse mediante *addenda* cos mesmos requisitos e condicións que para a aprobación do convenio, agás aquelas modificacións de carácter técnico aprobadas polo órgano de contratación, de acordo coa normativa de contratos administrativos, que non impliquen a superación do importe máximo reflectido na cláusula primeira do convenio.

En todo caso, os compromisos de gasto aprobados pola Axencia Galega de Infraestruturas, recollidos neste convenio, poderán ser axustados unilateralmente por parte da Axencia Galega de Infraestruturas, co límite da cantidade máxima prevista na cláusula terceira do convenio e sempre que non aumente o número de anualidades, para acompasalos ao importe de adxudicación e ao ritmo de execución das obras de referencia, ou, en xeral, calquera outra circunstancia que atrase a execución do convenio, sen que este axuste necesite da tramitación dunha addenda ao convenio.

Calquera outra modificación no contido deste convenio, requirirá acordo unánime entre o Concello de Santa Comba e a Axencia Galega de Infraestruturas.





SÉTIMA.- RESOLUCIÓN

Serán causas de extinción deste convenio:

- O non cumprimento do seu obxecto,
- A inviabilidade da realización das actuacións descritas neste convenio, por causas non imputables ás partes.
- O incumprimento de carácter total ou parcial de calquera das cláusulas do presente convenio. Entenderase por incumprimento parcial aquel que implica en maior ou menor grao a non consecución dos fins propios do convenio ou impidan de xeito directo ou indirecto as actuacións previstas no presente convenio.
- Denuncia por causas de interese público, a instancia de calquera das partes.

Cada unha das situacións descritas por si soa é causa suficiente de rescisión do convenio.

OITAVA. - PUBLICIDADE

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30 do 15 de febreiro) e o Decreto 126/2006, do 20 de xullo polo que se regula o rexistro de convenios da Xunta de Galicia (DOG núm. 149 do 3 de agosto).

NOVENA.- VIXENCIA DO CONVENIO

Este convenio terá vixencia dende a súa sinatura ata o 31 de decembro de 2023.

E para que así conste e en proba de conformidade asinan electronicamente o presente documento

A presidenta da Axencia Galega de
Infraestruturas

Ethel M^a Vázquez Mourelle

A alcaldesa do Concello de Santa
Comba

María Josefa Pose Rodríguez

